

Bosna i Hercegovina je za period januar-juni 2018. godine izvezla električne energije u vrijednosti 330,9 miliona KM, izvještava Indikator.ba.

To je za 31,4 posto više nego u istom periodu prošle godine, pokazuju podaci Agencije za statistiku BiH.

Istovremeno, naša zemlja uvezla je električne enerije za 78,2 miliona KM što je za 48,5 posto manje nego u istom periodu 2017. godine.

Dobri rezultati u izvozu i uvozu električne energije ove godine održavaju povoljne hidrološke prilike, za razliku od prošle godine koja je u tom pogledu bila jedna od najgorih.

Sve ovo odrazilo se na poslovanju elektroprivrednih preduzeća. Tako je Elektroprivreda HZHB Mostar povećala poslovne prihode u odnosu na prošlogodišnje polugodište za 53,7 posto na 214,7 miliona KM, te je ostvarila neto dobit od čak 38,66 miliona KM.

Elektroprivreda HZHB, koja proizvodnju uglavnom bazira na hidroelektranama, od prije nekoliko mjeseci proizvodi struju i iz prve vjetroelektrane u BiH -Mesihovina.

Za razliku od mostarske, sarajevska elektroprivreda je imala za 14,5 posto manje poslovne prihode nego lani, ali je sa gubitka od 22,8 miliona KM na polugodištu došla do dobiti od 28 miliona KM.

Treba imati na umu da je na prošlogodišnje poslovanje Elektroprivrede BiH osim loše hidrologije uticao i ugovor sa mostarskim Aluminijem o isporuci električne energije, koji se zbog naglog skoka cijene struje na berzi pokazao naodrživim te je sa polugodištem prošle godine i raskinut.

Vanredno dobre rezultate ove godine imala je i Elektroprivreda RS koja je izvijestila o 56 miliona KM dobiti u prvih šest mjeseci 2018. godine, a u "zelenom" su bila sva zavisna preduzeće iz sastava holdinga.

Ukoliko se povoljan razvoj nastavi do kraja godine, BiH bi mogla u 2018. ostvariti vrijednosno najveći izvoz električne energije u posljednjih nekoliko godina i premašiti brojku od 471,9 miliona KM ostvarenih 2013. godine.

Izvor: indikator.ba